

Inatsisissatut siunnersuummut oqaaseqaatit

Oqaaseqaatit nalinginnaasut

Inatsisissatut siunnersuut allannguutinik annikitsunik marlunnik imaqarpoq, tassuunakkut bibliotekeqarneq pillugu Inatsisartut peqqussutaat, pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaannut ilanngunneqarluni.

Inatsisissatut siunnersuummut tunngaviuvoq Inatsisartut Ombudsmandiata, atuagaateqarfiit atuagaataannik atukkanillu allanik kingusinaartumik utertitsisoqarnerani akiliisitsissutinik akiligassiisarnissamik periarfissiisumik aalajangersaasoqarnissaanik Kultureqarnermut, Ilinniartitaanermut, Ilisimatusarnermut Ilageeqarnermullu Pisortaqaarfimmu qinnuteqarsimanera. Periarfissaq taanna bibliotekeqarneq pillugu Inatsisartut peqqussutaatigut aqutissiuunniarneqassaaq. Periarfissiuussinermut tassunga atatillugu bibliotekeqarneq pillugu Inatsisartut peqqussutaata, pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaanni ilaalernissaa kissaatigineqarpoq, ilaatigut atuagaateqarfiit akiliisitsissutaasigut pisortanut akiligassat taanna malillugu aningaasarsianit unerartitsinikkut il.il. akilersinniarneqarsinnaanngorlugit.

Aningaasatigut allaffissornikkullu pisortanut sunniutissai

Kommunit akiliisitsiniartarfiisa bibliotekeqarneq pillugu Inatsisartut peqqussutaat naapertorlugu akiitsunik akiliisitsiniarsinnaanerisa pitsanngoriaateqarnissaa naatsorsuutigineqarpoq, tassami aningaasarsianik unerartitsisoqarsinnaalissammat, pinngitsaaliillunilu akiliisitsisoqar-sinnaalissalluni.

Atuagaateqarfiit akiliisitsiniartarnerminnut kredsrettit aqutigeqqaartariaarummatigut kom-munilli akiliisitsiniartartui aqutigalugit pinngitsaaliinikkut akiliisitsiniarsinnaalernerisa ki-ngunerisaanik akiitsut annertunerusut isertinneqartalernissaat naatsorsuutigineqarpoq. 2003-ip naanerani Kalaallit Nunaanni atuagaateqarfiit atorniartartunit 100.000 kr.-it missaani akiitso-qarfigineqarput. Naatsorsuutigineqarpoq pinngitsaaliinikkut akiliisitsiniarsinnaalernerup ki-ngunerissagaa ullumikkut akiitsut appartinneqarsinnaassasut. Ukiuni tulluuttuni naatsorsuu-tigineqarpoq pinngitsaaliilluni akiliisitsiniarsinnaalernerneq ukiumut 30.000 kr.-it qulaannagit isertinneqartalissasut.

Inuussutissarsiutinut il.il. aningaasatigut allaffissornikkullu sunniutissai

Siunnersuut inuussutissarsiortut aningaasarsiornerannut inuussutissarsiortulluunniit allaffissornerannut sunniuteqassangatinneqanngilaq.

Avatangiisinut pinngortitamullu sunniutissai

Inatsisissatut siunnersuut avatangiisinut pinngortitamulluunniit sunniuteqartussaangilaq.

Innuttaasunut allaffissornikkut sunniutissai

Siunnersuut innuttaasunut allaffissornikkut sunniuteqassangatinneqanngilaq.

Naalagaaffeqatigiinnermut namminersulernissamullu tunngasut

Inatsisissatut siunnersuut naalagaaffeqatigiinnermut namminersulernissamulluunniit tunngassuteqartunik imaqanngilaq.

Tusarniaaneq

Inatsisissatut siunnersuut, novembarip 9-ani 2004-mi, decembarip 13-ani 2004-mi akerii-gassanngorlugu tusarniaassutigineqarnikuuvoq KANUKOKA-mut, Aningaasaqarnermut Pi-sortaqarfimmut aamma Kultureqarnermut, Ilinniartitaanermut, Ilisimatusarnermut Ilagee-qarnermullu Pisortaqarfimmut

Inatsisileriffik oqaaseqaatinik ataasiakkaanik nassiussaqarpoq taakkulu inatsisissatut siunner-suummut ilanngunneqarnikuupput. Aningaasaqarnermut Pisortaqarfimmit akiliisitsiniartar-nerup pitsanngortinneqarneratigut aningaasatigut sunniutissai nalilersoqquneqarput. Taakku oqaaseqaatinut ilanngunneqarnikuupput. Naggataatigullu atortuulersinneqarnissaanut piffis-saliussaq juunip aallaqqaataanut 2005-imut allannngortinneqarluni, taamaalilluni inatsisissatut siunnersuut una, bibliotekeqarneq pillugu Inatsisartut peqqussutaallu ataatsikkut atortuulersinneqartussanngorlugit.

Inatsisissatut siunnersuummi aalajangersakkanut ataasiakkaanut oqaaseqaatit

§ 1, nr. 1-3-mut

Bibliotekeqarneq pillugu peqqussut ilanngunneqarpoq, tassuunakkut Inatsisartut peqqussutaat taanna tunngavigalugu akiligassiissutaalersimasut akiliisitsiniartarneq pillugu Inatsisartut inatsisaanni aalajangersakkat naapertorlugit akilersinniarneqarsinnaanngorlugit.

Nr. 4-mut

Paragraffip taassuma allanngortinneqarneratigut bibliotekeqarneq pillugu Inatsisartut peqqussutaat ilanngunneqarpoq, taamaalillutik Inatsisartut peqqussutaat naapertorlugit akiligassat pinngitsaaliinikkut akilersinniarneqarsinnaanngorlugit. Tassunga tunngaviupput atuagaateqarfiit pigisaat pillugit akiliisitsissutissat nalileruminartuummata aammalu naammagittaalliuutigineqarsinnaanerit annertunani. Taakku saniatigut akiligassat aamma annertuujusarnaviannngillat, taamaattumillu eqqartuussivinnit tunngavissamik qinnuteqarnissaq siunertaqartussaananani.

§ 2-mut

Siunnersuutigineqarpoq Inatsisartut inatsisissaat 1. juni 2005-mi atortuulersinneqassasoq.